

太平經卷之四十八

三合相通訣第六十五

受

純謹再拜請問一事真人所疑者何等也哉
 朝學暮歸常居靜處思其要意不敢有懈也
 今天師書辭常有上皇太平氣且至今是何
 謂為上何謂為皇何謂為太何謂為平何謂
 為氣真人今且何賅何疑一時欲難問微言
 意哉所以及天師徧具問書文意者書上多
 道上皇氣且至而不得其大要意今不及天
 明師訣問之恐後遂無從得知之故敢不具
 問之也善哉子之言萬世不可易也夫天至
 道大德盛仁時已到皇靈樂人急行之故天
 氣飄子之心使子旦夕問天法察察吾甚恠
 之諾真人安坐為子具分解其字意使可傳
 而無極時然上為字者一畫也中央復畫一
 直上行復抱一一而上得三一上行而不止
 不復下行也故名為上者迺其字無復上也
 反上為下下者一畫也亦中央復畫直下行
 復抱一其行遂下不得復上故名為下也夫
 志常欲下行者久久最下無復下也比若濁

者樂下為地故地最下無復下也上為字者
 常上行不得復下比若清者樂上行為天天
 乃無上也是故天之為法名各自字各自
 定凡天下事皆如此矣故聖人制法皆象天
 之心意也守一而樂上卜卜者問也常樂上
 行而卜問不止者大吉最上之路也故上字
 一畫直上而卜下為字者一下而卜下問也
 常思念問下行者極無下故樂下益者不復
 得上也故上常無上字者迺言其治當日上
 行合天心復無上也善哉善哉明師幸哀為
 其解上字願復聞皇為字者一日而王日上
 一者天也天者數一天得日昭然大明則王
 故為字一與日王并合成皇字也一為天天
 亦君長也日亦君長也王亦君長也三君長
 相得成字名為皇皇者乃言其神威煌煌故
 名為皇也皇天下第一無復能上者也善哉
 善哉師幸哀聞以皇字願聞其太平氣之字
 太者大也迺言其積大行如天凡事大也無
 復大於天者也平者乃言其治太平平均事
 悉理無復私也平者比若地居下主執平

也地之執平也比若人種善得善種惡得惡
 人與之善用力多其物子好善人與之鮮鮮
 其物惡也氣者乃言天氣悅喜下生地氣順
 喜上養氣之法行於天下地上陰陽相交
 而為和與中和氣三合共養凡物三氣相愛
 相通無復有害者太者大也平者正也氣者
 主養以通和也得此以治太平而和且大正
 也故言太平氣至也善哉善哉此者乃獨言
 天地中和氣當合相通共治耶凡事皆當三
 合共事耶善哉善哉子之言也已得天法帝
 王象之以治比若神矣然為真人具說之自
 隨而記之唯唯元氣與自然太和之氣相通
 并力同心時悅悅未有形也三氣凝共生天
 地天地與中和相通并力同心共生凡物凡
 物與三光相通并力同心共照明天地凡物
 五行剛柔與中和相通并力同心共成共萬
 物四時氣陰陽與天地中和相通并力同心
 共興生天地之物利益仲季相通并力同心
 各共成一而地高下平相通并力同心共出
 養天地之物蠕動之屬雄雌合迺共生和相

通并力同心以傳其類男女相通并力同心
 共生子三人相通并力同心共治一家君臣
 民相通并力同心共成一國此皆本之元氣
 自然天地授命凡事悉皆三相通迺道可成
 也共生和三事常相通并力同心共治一職
 共成一事如不足一事便凶故有陽無陰不
 能獨生治亦絕滅有陰無陽亦不能獨生治
 亦絕滅有陰有陽而無和不能傳其類亦絕
 滅故有天而無地凡物無於止有地而無天
 凡物無於生有天地相連而無和物無於相
 容自養也故男不能獨生女不能獨養男女
 無可生子以何而成一家而名為父與母乎
 故天法皆使三合迺成故古者聖人深知天
 情象之以相治故君為父象天臣為母象地
 民為子象和天之命法凡擾擾之屬悉當三
 合相通并力同心迺能治成一事共成一家
 共成一體也迺天使相須而行不可無一也
 一事有完結不得其處便三毀三凶矣故君
 者須臣臣須民民須君迺能成成一事
 不足一使三不成也故君而無民臣無以名

為君有臣民而無君亦不成臣民臣民無君
 亦亂不能自治理亦不能成善臣民也此三
 相須而立相得迺成故君臣民當應天法三
 合相通并力同心共為一家也此若夫婦子
 共為一家也不可以相無是天要道也此猶
 若人有頭足腹迺成一身無可去者也去之
 即不足不成人也是天地自然之數也故古
 者聖人取法於天故男子須得順善女與為
 治然且有善子男者君也女者臣也子者民
 也故天命治國之道以賢明臣為友善女然
 後能和其子也善臣然後能和其民也善女
 然後能生善子善臣然後能生善民民臣俱
 好善然後能長安其上也真人欲樂知其效
 天者君也地者臣也天雨周流雨之善地生
 物善雨之惡地生物惡此之謂也今父母君
 臣尚但共持其大綱紀耳大要實仰衣食於
 子人無子絕無後世君少民無衣食不足令
 常用心愁苦故治國之道迺以民為本也無
 民君與臣無可治無可理也是故古者大聖
 賢共治事但旦夕專以民為大急憂其民也

若家人父母憂無子無子以何自名為父母
 無民以何自名為君也故天之法常使君臣
 民都同命同吉凶同一職一事失正即為大
 凶矣中古以來多失治之綱紀遂相承負後
 生者遂得其流災尤劇實由君臣民失計不
 知深思念善相愛相通并力同心反更相愁
 苦夫君乃一人耳又可處深隱四遠寬結實
 閉不通治不得天心災變恠異委積而不除
 天地所欲言人君不得知之大咎在此不三
 并力聰明絕邪氣結不理上為皇天大仇下
 為地大咎為帝王大憂災紛紛不解為民大
 害為凡物大疾病為是獨積久矣非獨今下
 古人過所致也真人亦知之乎知如此久矣
 實不知其所由致故問之誠寬今當奈何之
 乎然天太平氣方到治當得天心乃此惡悉
 自除去故天使吾具言之欲使吾救其失為
 出正文故使真人來悉開之也此所由生凶
 也不象天地元氣自然法不三相通并力同
 心故致此也若三相通并力同心今立平大
 樂立無災願開治之當云何乎哉急象天法

如比上為也。天法凡事三并力同心。故天以三光為文。三光常相通。共照無復絕時也。天券出以來。人以書為文。以治象。天三光。故天時時使河洛書出。重勅之。文書人文也。欲樂象天洞極神治之法。度使善日興。惡日絕。滅書者。但通文書三。道行書也。君宜善開導。其下為作明令。示勅教。使民各居其處。而上書悉道其所聞。善惡因却行。亦可但寄便足。亦可寄商車載來。亦可善自明姓字。到為法。如此則天下善惡畢見矣。君導天氣而下通。臣導地氣而上通。民導中和氣而上通。真人傳書。付有德之君。審而聆吾文言。立平立樂。災異除不失。錄分也。吾書敬受於天。法不但空陳偽言也。天誅殺吾子。亦知是謫重耶。唯唯欲得吾書。信得即效。司之與天地立響。相應是吾文信也。以此大明效證。可毋懷疑。夫治國之道。樂得天心自安者。但行此效。與天響相應。即天與人談之明券也。吾但見真人常樂助有德之君。欲報天重功。故一二言之耳。吾知其失在此。閉不通口。得書君為制。

作明教善令。言從今以往。吏民宜各居其處。力上書。悉道善惡。以明帝王治。以通天氣。勿得相止。止者坐其事。三年獨上書。盡信無欺。文者言且召而仕之。其仕之云何。各問其才能。所長以筋力。所及署其職。何必署其筋力所能。及乎天之事。人各因其能。不因其才能。名為故。寬人則復為結氣。增災所以然者。人所不及。雖生之。死猶不能為也。今人所樂。極樂得善物金玉也。今使明君有教。言人有能。撫手盡得天下。縣官金銀奇偽之物。不以過汝。盡以與汝。其人極樂得之也。力而不及物。繫其兩手。弊盡之。猶不能致也。今為人父母。君將署臣子之職。不以其所長。正交統之。猶不能理其職事。但空亂其官職。愁苦其民耳。官職亂。民臣愁。則復仰呼天。自言寬上動天。復增災。惟故古聖賢。欲得天心。重慎署置。皆得人心。故能稱天心也。其稱天心云何。行之得應其民。吏日善且信。忠是其效也。則遷之。以時是助國得天心之人也。或但有樂。一旦貪名得官。其行無效。不稱天心。無應者。夫帝

王。迺承天心而治。一當稱天心。不稱天心。為過。故其治無善。故應當退。使思過如此。則天已喜。而天下莫不盡忠。信盡其能力者也。幽隱遠方。聞之無蔽。其能者也。其上書急者。人命至重。不可須臾。人且復啼呼。寬今復結增。惟變疾解報之。其事可忍。者須秋冬。何必須秋。冬乎。然秋者。物畢成。冬者。物畢藏。天氣定也。物以仲秋八月成熟。其實核可分別。故當順天地之法。始以八月分別。視之。九月者。天氣之究竟也。物到九月。盡欲死。故當九月。究竟讀視之。觀其善惡多少。十者數之終也。故物至十月。而反。初天正以八月為十月。故物畢成。地正以九月為十月。故物畢。老人正以亥為十月。故物畢。死三正。竟也。物當復生。故乾在西北。凡物始核於亥。天法以八月而分別之。九月而究竟之。十月實核之。故天地人三統俱終。實核於亥。故十月而實核。下付歸之所以然者。此八月九月十月三月也。天地人正俱畢。竟當復反。始不實。不核。不得其意。天地且不悅。喜其災不除。復害來。年故八月

而分別視之九月而究竟之十月而實核下
 付歸之令使吏民悉得更思過失不敢復為
 也來年吏民更謹凡物悉善矣不歸使思過
 固固民臣居下失政今不自知有過其心不
 易天道固固惡不易矣故當付歸之也真人
 欲知其效今年所付歸因書一通自置之亦
 教吏民自記一通置之視善惡多少名為天
 券來年付歸復置一通視善惡多少來年復
 付歸置一通視善惡多少下踈與上所記置
 當繇相應名為天徵合符令吏民更易心為
 善得天意所上當多善若令大易當大善若
 今固固無變不易所上固固如令為惡不止
 所上當益惡吏民大欺忿天所上當大惡增
 劇故是天洞明照心之鏡也不失錄分以明
 吏民治行夫天地比若影響隨人可為不脫
 也真人幸有善意努力卒之慎之子雖來問
 此若無事無益天內默視子口可言以何明
 之以言也夫人言事辭詳善人即報之以善
 響亦應之以善其言凶惡不祥人亦報之以
 惡響亦應之以惡也凡事相應和者悉天使

之也子寧解耶唯唯夫天迺高且遠尊嚴安
 可事事自下與人言語乎故其法皆以自然
 應和之也子心今開不唯唯已解願及天師
 復假一言行道之中古皇無文不三相通以
 何能安之乎善哉子之言也天運使其時人
 直質樸其人皆懷道而信又專一但流言相
 通人人各欲至誠信思稱天心迺無一相欺
 者也故君臣民三并力同心相通故能相治
 也如使不同心為一家即亂矣今者承負而
 文書衆多更文相欺尚為淳華賢儒俱迷共
 失天心天既生文不可復流言也但當實核
 得其實三相通即天氣平矣天法者或億或
 萬時時不同治各自異術各不同也今者太
 平氣且至當實文本元正字迺且得天心意
 也子不能分別天地立事以來其治億端行
 其事悉得天應者是也不得天應者非也是
 即其大明天券徵驗效也寧解耶唯唯行去
 勿得復問今非不能為子悉記天地事立以
 來事事分別解天下文字也但益文難勝記
 不可為才用無益於王治故但悉指授要道

而言夫治不理本由天文耳是天地大病所
 疾也古時賢聖所共憎惡也故道為有德君
 出不敢作文皆使還守實求其根保其元迺
 天道可理國自安真人雖好問勿復令益文
 也去思之唯唯

右包界元氣自然天地凡事三合相通并
 力同心天明券和皇平治法

太平經卷之四十八